



新刻五倫詩選全

長樂郭振鐸
請子書

李攀龍
選輯

父子類

五言古詩

遊子吟

孟郊

慈母手中線遊子身上衣
臨行密密縫意恐遲遲歸
誰言寸草心報得三春暉

淚墨洒為書將寄萬里親
書去魂亦去兀然空一身

慈烏夜啼

白居易

慈烏失其母啞啞吐哀音
晝夜不飛去經年守故林

夜夜夜半啼聞者為沾襟聲中如告訴未盡返哺心
百鳥豈無母爾獨哀怨深應是母慈重使爾悲不任
昔有吳起者母歿喪不臨哀哉若此輩其心不如禽
慈鳥復慈鳥鳥中之曾參

燕詩贈劉叟

叟有愛子外去叟思之甚悲叟少時亦嘗如是故作是詩喻之

梁上有雙燕翩翩雄與雌銜泥兩椽間一巢生四兒
四兒日夜長索食聲孜孜青蟲不易捕黃口無飽期
嘴爪雖欲弊心力不知疲須臾十來往猶恐巢中饑
辛勤三十日母瘦雛漸肥喃喃教言語一一刷毛衣
一旦羽翼成引立庭樹枝舉翅不回顧隨風四散飛

雌雄空中鳴聲盡呼不歸却入空巢裏啁啾終夜悲
燕燕爾勿悲爾當反自思思爾為雛日高飛背母時
當時父母念今日爾應知

示兒

趙華間

閉門避秋風開門落葉滿稗子晨發篋却嫌故衣短
衣短何足嫌掩脛尚可挽爾父故多憂爾母復不懶
力作常苦饑力織未及煖窮厄世固多榮華亦滿眼
但將爾日長勉旃事編簡

此詩可見清貧而能訓子

送錢伯雲吳興迎養

全思誠

淵獺知報本野狐能首丘孰云萬物靈不與此心侔

君方去迎養我敢思遠遊匪無菽水歡常懷風樹憂
徘徊松江上憐君如贅旒弁山青入天白雲正悠悠

五言律詩

孟氏

杜甫

孟氏好兄弟養親唯小園承顏抵手足坐客彊盤飧
負米多葵外讀書秋樹根卜隣慚近舍訓子覺先門

守官金華思親二首

孩提便陟岵匪母更誰依屢為賓截髮嘗因子斷機
乾坤恩罔極晨夕奉無違肯被微官縛長歎賦式微
聖朝崇孝治忍廢白華詩噉指心常動縫衣意恐遲

兒因官遠母母嘆子無兒建婺城頭角晨昏兩地悲

題思親卷

錢惟善

畫出孤雲隴孟圈入夢思丁蘭稱孝子狄相是吾師
寸草何由報千金慎所遺南風無復作淚落白華詩

長律

元日示宗武

杜甫

覓句新知律攤書解滿床試吟青玉案莫帶紫羅囊
假日從時飲明年共我長應須飽經術已似愛文章
十五男兒志三千弟子行曾參與游夏達者得升堂

七言絕句



应为 13

閒居

邵雍

堂上慈親八十餘
堦前兒輩戲相呼
旨甘取足隨豐儉
此樂人間更有無

壬午九月寄書老母

謝枋得

九十萱親天下稀
吾王何在子何之
倚門旦暮無他念
一片好心天地知

九十萱親天下稀
平生教子欲何為
楚王肯立韓公子
良也歸韓亦有辭

客中清明感事集句

陳孚

慈母年高鶴髮垂
賈存鄉書無鴈到家遲
許初過寒

食一百六

元稹一日思親十二時
山谷

思親

貫雲石

天涯萱草亦婆娑
三釜淒然奈我何
細較十年元下淚
不如慈母線痕多

規諷

無名氏

西湖歌舞何時了
南國佳人絕代無
莫上吳山最高處
楚天空濶白雲孤

客中得母寄布

釋克恭

我母今年七十強
獨憐季子在他鄉
寄來新織機頭布
一寸麻絲一寸腸

奉母行道中

母在籃輿子在途子行不上母頻呼西風落日荒山
道羞見前林反哺烏

樹萱堂

孫華

手植忘憂慰母顏每憐寸草報春難誰家人在閑庭
院却與兒孫種牡丹

題墨萱

慈親疇昔倚門時曾記忘憂慰別離孤子恨無懷橘
日十年腸斷樹萱詩

七言律詩

送輔十四江東省覲

杜甫

兵戈不見老萊衣歎息人間萬事非我已無家尋弟
妹君今何處訪庭闈黃牛峽靜灘聲轉白馬江寒樹
影稀此別應須各努力故鄉猶恐未同歸

示子

洪芻

大學何蕃久不歸十年甘旨誤庭闈休辭客路三十
遠須念人生七十稀腰下雖無蘇子印篋中幸有老
萊衣歸期定約春前後免使高堂賦式微

示兒

謝枋得

門戶興衰不自由樂天知命我無憂大兒安得孔文

舉生子當如孫仲謀天上麒麟元有數人間豚犬不
須愁養男不教父之過莫視詩書如寇讐

題趙子敬御史志養堂

趙孟頫

忠養堂前驄馬歸融融喜氣動庭闈能令將種為書
種可是斑衣勝繡衣手樹叢萱侵雪色心同寸草報
春暉不須更上陳情表親壽康強世所稀

袁克中都事降香南閩訪母俞氏得迎以歸

作詩美之

吾鄉不墜堯遺俗千載今猶見若人聖主如天成孝
治使臣有地遇慈親南州冠蓋迎歸遠上國鶯花送

喜頻他日汗青當不朽好裁佳傳播光塵

君臣類

五言古詩

出自薊北門

鮑照

羽檄起邊亭烽火入咸陽徵師屯廣武分兵救朔方
嚴秋筋卒勤虜陣精且強天子按劍怒使者遙相望
鴈行緣石徑魚貫度飛梁簫鼓流漢思旌甲被胡霜
疾風衝塞起沙礫自飄揚馬尾縮如蝟角弓不可張
時危見臣節世亂識忠良投軀報明主身死為國殤

正氣歌

文天祥

天地有正氣雜然賦流形下則為河嶽上則為日星
於人曰浩然沛乎塞蒼冥皇路當清夷倉和吐明庭
時窮節乃見一一垂丹青在齊太史簡在晉董狐筆
在秦張良椎在漢蘇武節為嚴將軍頭為嵇侍中血
為張睢陽齒為顏常山舌或為遼東帽清操厲冰雪
或為出師表鬼神泣壯烈或為渡江楫慷慨吞胡羯
或為擊賊笏逆豎頭破烈是氣所磅礴凜冽萬古存
當其貫日月生死安足論地維賴以立天柱賴以尊
三綱實繫命道義為之根嗟予遘陽九隸也實不力
楚囚纓其冠傳車送窮北鼎鑊甘如□求之不可得

陰房間鬼火春院闕天黑牛驥同一皁雞栖鳳凰食
一朝蒙霧露分作溝中瘠如此再寒暑百沴自辟易
哀哉沮洳場為我安樂國豈有他繆巧陰陽不能賊
顧此耿耿在仰視浮雲白悠悠我心憂蒼天曷有極
哲人日已遠典刑在宿昔風簷展書讀古道照顏色

五言律詩

夜聞笛

張巡

岌峩試一臨虜騎俯城陰不辨風塵色安知天地心
門開邊月近戰苦陣雲深旦夕更樓上遙聞橫笛音

贈梁州張都督

崔顥

聞君為漢將虜騎不難侵出塞清沙漠還家拜羽林
風霜臣節苦歲月主恩深為語西河使知余報國心
五言長律

勵士

張巡

接戰春來苦孤城日漸危合圍伴月暈分守效魚□
屢獻黃塵起時將白羽麾裏瘡猶出戰飲血更登陴
忠信應無敵堅城諒不移無人報天子心計欲何施

七言絕句

聞諸將入朝歡喜口號

杜甫

社稷蒼生計必安蠻夷雜種錯相干周宣漢武今王

是孝子忠臣後代看

李相將軍擁薊門白頭惟有赤心存竟能盡說諸侯

入知有從來天子尊

李光弼也

題陽城人

呂溫

忠驅義感即風雷誰道長沙乏武才天下舉兵誅董
卓陽城子弟最先來

詠史

紀信生降為沛公草荒孤壘想英風漢家青史緣何
事却道蕭何第一功

匡救

宋高宗與妃放鴿此詩諷之遂止

無名氏

萬鴿飛翔逸帝都暮收朝放費工夫爭如養取南來
鴈沙漠能傳二帝書

九日感懷

陳與義

憶得甲辰重九日天恩曾預宴城東龍沙北望西風
冷誰折黃花壽兩宮

管寧濯足圖

楊□

踏徧遼東未是癡藜牀欲□只心知好留一掬黃泥
冰漫却曹卽受禪碑

鄭子真畫像

楊載

躬耕谷口雜編民寧肯懷金媚賊臣楊子解言如許

事不知執戟是何人

七言律詩

諸將

杜甫

韓公本意築三城擬絕天驕拔漢旌豈謂盡煩回紇
馬翻然遠牧朔方兵胡來不覺潼關隘龍起猶聞晉
水清獨使至尊憂社稷諸君何以荅昇平

送唐介

李師中

孤忠自許衆不與獨立敢言人所難去國一身輕似
葉高名千古重如山並遊英俊顏何厚未死奸諛骨
已寒天為吾皇扶社稷肯教夫子不生還

過零丁洋

文天祥

辛苦遭逢起一經，千戈落落四周星。
山河破碎水漂絮，身世浮沉風打萍。
皇恐零丁洋裏歎，零丁人生自古誰無死。
留取丹心照汗青。

挽文丞相

塵海焉能活壑舟，燕臺從此築詩囚。
雪霜萬里孤臣老，光岳千年正氣收。
諸葛未亡猶是漢，伯夷雖死不從周。
古今成敗應難論，天地無窮草木秋。

又

虞集

徒把金戈挽落暉，南冠無奈北風吹。
子房本為韓仇

出諸葛安知漢祚移，雲暗鼎湖龍去遠。
月明華表鶴歸遲，何人更上新亭飲。
大不如前洒淚時。

北行

謝枋得

雪中松柏愈青青，扶植綱常在此行。
天下久無龔勝索，人間豈獨伯夷清。
義高便覺生堪舍，禮重應知食可輕。
南八男兒終不屈，皇天上帝眼分明。

讀前史偶書

杜仁傑

楊彪不着鹿皮冠，元亮還書甲子年。
此去亂離何日定，向來名節幾人全。
中原消息蒼茫外，故里山河涕淚邊。
六國帝秦天暫醉，魯連休死海東孺。

題岳鄂王墓

趙孟頫

岳王墓上草離離秋色荒涼石獸危南渡君臣輕社稷中原父老望旌旗英雄已死嗟何及天下中分遂不支莫向西湖歌此曲水光山色不勝悲

和前韻

莫向西風歎黍離英雄生死繫安危內庭未下班師詔朔漠先收大將旗父子一門甘死節山河萬里竟分支孤臣尚有埋身塚二帝遊魂實可悲

夫婦類

五言古詩

別家室

蘇武

結髮為夫妻恩愛兩不疑歡娛在今夕嫵婉及良時征夫懷往路起視夜何其參辰皆已沒去去從此辭行役在戰場相見未可期握手一長歎淚為生別滋努力愛春華莫忘歡樂時生當復來歸死當長相思

古詩

無名氏

冉冉孤生竹結根泰山阿與君為新婚兔絲附女蘿兔絲生有時夫婦會有宜千里遠結婚悠悠隔山陂思君令人老軒車來何遲傷彼蕙蘭花含英揚光輝過時而不朱將隨秋草萎君亮執高節賤妾亦何為

贈內

白居易

生為同室親死為同穴塵他人尚相勉而况我與君
黔婁固窮士妻賢忘其貧冀缺一農夫妻敬儼如賓
陶潛不營生翟氏自爨薪梁鴻不肯仕孟光甘布裙
君雖不讀書此事耳亦聞至今千載後傳是何如人
人生未死間不能忘其身所須者飲食不過飽與溫
蔬食足充饑何必膏粱珍繒絮足禦寒何必錦繡文
君家有遺訓清白貽子孫我亦貧若士與君新結婚
庶得貧與素偕老同欣欣

胡氏洞虎圖

楊載

濱有烈婦人胡姓嫁劉氏從夫棗陽戍車宿水之滋
夜半猛虎至銜夫入窟翳夫人自驚起不暇自為計
直前執虎足盡力與牽制呼兒抽佩刀刃刺虎立斃
夫命復不救復讐古所貴嗚呼流俗弊人義日以廢
婦不天其夫臣子競為利惠難圖苟免聞此得無愧
吾故作此詩于以告萬世

馬氏節婦

趙孟頫

挺挺霜中竹秀色寒更綠貞節貫四時嗟爾受命獨
天人早已亡能孝事其姑補紉奉甘旨饘粥撫遺孤
子長姑已亡終始四十載樹靜風不寧欲養親不待

朝廷推厚恩復稅旌其門母死子又孝源清流不渾
伯也廬墓側仲也仕文墨紛紛薄俗中三世種穡德
吾聞二子賢子賢由母教爰作馬氏詩亦以勸忠孝

鄭節婦

劉紹

婦道繫彞典高情懷衛姜凱風繼以作板蕩誰隄防
卓行出流俗所悲夫早亡奉姑終乃身厥志久益減
空谷跫足音晦冥見朝陽滴俗誠可肅孤貞凜秋霜
時無魯中叟載筆徒慨慷

五言律詩

次答止卿

楊紫明

容愁青鏡裏歸夢白鷗邊故國人在新秋月又圓
米鹽逢此日詩酒負殘年長羨平林鳥雙飛入暮烟

寄遠

周德可

漫風驚枕簟漢月耿房帷何處懷人切停梭見鴈時
寒生衣莫寄瘦盡鏡先知願子長努力效忠歸未遲

七言古詩

寄衣曲

張籍

織素裁衣獨苦辛遠因回使寄征人官家亦自寄衣
去貴從妾手着君身高堂姑老無侍子不得自到邊
城裏殷勤為着初着時征夫身上宜不宜

野雞毛羽好

劉氏雲

野雞毛羽好不如家雞能報曉
新人美如花不如舊人能績麻
績麻作衫即得着即見花開又花落

張節婦詞

靈壽張明府嫡母早寡守志

高啓

誰言妾有夫中路棄妾身先殂
誰言妾無子側室生兒與夫似
兒讀書妾辟纒空房夜夜聞啼鳥
兒能成名妾不嫁良人瞑目黃泉下

七言絕句

古意

王駕

夫戍蕭關妾在吳西風吹妾妾憂夫
一行書信千行

淚寒到君邊衣到無

過清風嶺

李孝先

長下江流水自清山頭明月已無情
此行若愧王貞婦不向清風嶺上行

七言律詩

進艇

杜甫

南京又客耕南畝北望傷神坐北窓
畫引老妻乘小艇晴看稚子浴清江
俱飛蛺蝶元相逐並蒂芙蓉本自雙
茗飲蕪漿携所有瓷罌無謝玉為缸

春別

章碣

擲下離觴指亂山趨程不待風笙殘花邊馬嚼金銜
去樓上人垂玉筍看柳陌雖然鳳裊裊葱河猶自雪
漫漫殷勤莫厭貂裘重恐犯三邊五月寒

黃節婦

虞集

貞婦初年邁百難每將忠厚對傷殘死生家世心無
媿終始閨門義所安信有高風隨地化不營華表與
時看賢兄述德皆真實為報鄉人在史官

兄弟類

五言古詩

別昆弟

蘇武

骨肉緣枝葉結交亦相因四海皆兄弟誰為行路人
况我連枝樹與子同一身昔為鴛與鴦今為參與辰
昔者常相近邈若胡與秦惟念當別離恩情日以新
鹿鳴思野草可以喻嘉賓我有一樽酒欲以贈遠人
願子留斟酌叙此平生親

五言律詩

村夜

杜甫

風色瀟瀟暮江頭人不行村春雨外急隣火夜深明
胡羯何多難漁樵寄此生中原有兄弟萬里正含情

送舍弟

嚴正文

踈懶吾成性才華爾自強但稱眉最白何事髮仍黃
時暑嗟行役家貧念聚糧祗應宵夢裏詩興屬池塘

示弟

許渾

自爾出門去淚痕長滿衣家貧為客早路遠得書稀
文字何人賞烟波幾日歸秋風正搖落孤鴈又南飛

晚至青口

長年困行役短髮易飄零世事驚春夢交情散曉星
燒痕侵路黑柳色夾堤青落日明霞底原情動鵲鴿

舟次寶應縣雨中與弟別

薩都刺

解纜不忍別船頭雨濕衣汝兄猶是客吾弟自先歸

行役關河遠虛名骨肉稀如何淮水鴈不作一行飛

五言長律

遠懷舍弟穎觀等

杜甫

陽翟空知處荆南近得書積年仍遠別多難不安居
江漢春風起冰霜昨夜除雲天猶錯莫花萼向蕭疎
對酒都疑夢吟詩正憶渠舊時元會日鄉黨羨吾廬

自江陵之徐州路上寄兄弟 白居易

岐路南將北離憂弟與兄關河千里別風雪一身行
夕宿勞鄉夢晨裝慘旅情家貧憂後事日短念前程
烟鴈翻寒渚霜鳥占古城誰憐陟岡者西楚望南荆

七言古詩

弟華堂

為錢唐羅雲叔題

鄧文原

江空暗雨飛鴻杳，天長古道行人少。
芳草池塘夢欲迷，紫荊庭下花如掃。
誰似君家常棣華，炫日矜春長媚好。
文采風流昭諫孫，詩書滿屋來華軒。
我聞同姓言所敦，尺布斗粟何足論。

七言絕句

九日憶山東兄弟

王維

獨在異鄉為異客，每逢佳節倍思親。
遙知兄弟登高日，遍插茱萸少一人。

別李浦之京

王昌齡

故園今在灞陵西，江半逢君醉不迷。
小弟隣莊尚漁獵，一封書寄數行啼。

秋霖夜憶家

韓偓

垂老何時見弟兄，背燈愁泣到天明。
不知短髮能多少，一滴秋霖白一莖。

寒食寄京師諸弟

韋應物

雨中禁火空齋冷，江上流鶯獨坐聽。
把酒看花想諸弟，杜陵寒食草青青。

七言律詩

九日

杜甫

重陽獨酌盃中酒抱病起登江上臺竹葉於人既無
分菊花從此不須開殊方日落玄猿哭舊國霜前白
鴈來弟妹蕭條各何往干戈衰謝兩相催

別中都明府兄

李白

吾兄詩酒繼陶君試宰中都天下聞東樓喜奉連枝
會南陌還為落葉分城隅綠水明秋日海上青山隔
暮雲取醉不辭留夜月鴈行中斷惜離羣

別舍弟宗一

柳宗元

零落殘魂倍黯然雙垂別淚越江邊一身去國六千

里萬死投荒十二年桂嶺瘴來雲似墨洞庭春盡水
如天欲知此後相思夢長在荆門郢樹烟

懷益之兄

元好問

牢落關河鴈一聲干戈滿眼苦為情三年浪走空皮
骨四海相望只弟兄黃耳定從秋後到白頭新自夜
來生西樓日日西州道欲賦窮愁竟不成

至日

楊

恨初年少在南梁兄弟歡遊久未忘春色共傾花底
酒雨聲常對水邊床怒鯨一夕掀洪浪斷鴈何時續
舊行辜負亂來同被約尺書不到十年弘

得家書寄呈兄

陳孚

風南枝北雨沉沉忽有家書似萬金三十年間聽雨
夢八千里外望雲心舊書尚喜黃盈架先隴應添碧
滿林若問弟遊新况味紫薇花發玉堂春

朋友類

五言古詩

別李陵

蘇武

雙鳧俱北飛一鳧獨南翔子當留斯館我當歸故鄉
一別如秦胡會見何詎央愴恨切中懷不覺淚沾裳
願子長努力言笑莫相忘

與蘇武

李陵

良時不再至離別在須臾屏營衢路側執手野踟躕
仰視浮雲馳奄忽互相踰風波一失所各在天一隅
長當從此別且復立斯須欲因晨風發送子以賤軀

贈衛八處士

杜甫

人生不相見動如參與商今夕復何夕共此燈燭光
少壯能幾時鬢髮各已蒼訪舊半為鬼驚呼熱中腸
焉知二十載重上君子堂昔別君未婚兒女忽成行
怡然敬父執問我來何方問答未及已兒女羅酒漿
夜雨剪春韭新炊間黃粱主稱會面難一舉累十觴

十觴亦不醉感子故意長明日隔山嶽世事兩茫茫

審交

孟郊

種木須擇地惡土變木根結交若失人中道生謗言
君子芳桂性春榮秋更繁小人槿花心朝在夕不存
莫躡冬冰堅中有潛浪翻唯當金石交可與賢達論

耐交吟

任森

魚游南海潮木偃南山坳剖木木有漆煮魚魚有膠
二物幸相遇締固不可搖如何同心人不耐白首交

七言古詩

結交行

種樹莫種楊柳枝結交莫結輕薄兒柳枝不耐西風
吹薄交易結還易離君不見昨日書來兩相憶今日
相逢不相識不如柳枝猶耐久一度春風一回首

貧交行

杜甫

翻手作雲覆手雨紛紛輕薄何須數君不見管鮑貧
時交此道今人棄如土

七言絕句

投簡校州幕府兼簡常十郎官 杜甫

幕下即官安德無從來不奉一行書因知貧病人類
棄能使韋郎迹也踈

贈汪倫

李白

李白乘舟將欲行，忽聞岸上踏歌聲。
桃花潭水深千尺，不及汪倫送我情。

送李侍郎赴常州

賈至

雪晴雲散此風寒，楚水吳山道路難。
今日送君須盡醉，明朝相憶路漫漫。

玉關寄長安主簿

岑參

東去長安萬里餘，故人何惜一行書。
玉關西望腸堪斷，况復明朝是歲除。

題張主人壁

張正言

世人交結須黃金，黃金不多交不深。
縱令然諾暫相許，終是悠悠行路人。

聞白樂天左降江州

元稹

殘燈無焰影幢幢，此夕聞君謫九江。
垂死病中驚起坐，暗風吹雨入寒窓。

同李十一醉憶元九

白居易

花時同醉破春愁，醉折花枝當酒籌。
忽憶故人天際去，計程今日到梁州。

夢遊詩

元稹

夢公兄弟曲江頭，又向慈恩寺裏遊。
驛吏喚人驅馬

去忽驚身已在梁州

贈樂天

休遣玲瓏唱我詞
我詞多是寄君詩
明朝又向江頭別
月落潮平是去時

規蔡子思

賈存道

聖君恩重龍頭選
慈母年高鶴髮垂
君寵母恩俱未報
酒如成病悔何追

送元二使安西

王維

渭城朝雨浥輕塵
客舍青青柳色新
勸君更盡一盃酒
西出陽關無故人

七言律詩

送路六侍御入朝

杜甫

童稚情親四十年
中間消息兩茫然
更為後會知何地
忽漫相逢是別筵
不分桃花紅勝錦
生憎柳絮白於綿
劍南春色還無賴
觸忤愁人到酒邊

寄樂天

元稹

榮辱升沉影與身世情
誰是舊雷陳
惟應鮑叔偏憐我
我自保曾參不殺人
山入白樓沙苑暮
潮生滄海野塘春
老逢佳景惟惆悵
兩地各傷無限神

寄中書同年舍人

楊巨源

五倫詩選
清明紫閣最高峰仙掖開簾范彥龍五色天書詞煥
爛九華春殿語從容綵毫應染爐烟細清珮仍含玉
漏重二十年前同日喜碧霄何路得相逢

寄錢思復教授

張翥

每憶南州老廣文新詩寄我若春雲直推江總文詞
妙欲遣口苗筆硯焚海市秋濤吟處見山窓夜雨夢
中聞舊遊何在流芳歌遙想年來亦白紛

訪故人孫仲鼎

錢惟善

閉戶先生眉宇開一簾晴色照樓臺雪消大澤魚龍
喜雲隔上林鴻雁哀十里相思猶命駕十年重見且

銜盃小山叢桂渾無恙堂下斑闌學老萊

寄張翥


成廷珪

三寄新書竹下來多君高興憶東淮塵埃沒馬昏歸
舍風雨聽雞曉入齋此日陽城須諫議他年方朔謾
詠諧瓊瑤花底相思夜酒滿春城月滿街

寄沈裕因懷寇彥高

權衡

別後何遲沈子書邨南還訪寇君無接輿避世空憐
鳳張翰辭官豈為魚夜雨幾家紅杏熟薰風一枕黑
甜餘思君未見徒搔首短短蕭蕭不忍梳



Large, stylized, grey watermark or stamp, possibly a library or archival mark, oriented vertically. The characters are highly stylized and difficult to decipher, but appear to be a combination of letters and symbols.

Vertical columns of faint, illegible text, likely bleed-through from the reverse side of the page. The text is arranged in several columns, with some characters appearing to be in a traditional East Asian script.

新刻世範集事詩鑒

李攀龍校

子之於父當鑒顧愷

顧愷每得父書當掃几筵舒書於上拜跪讀之每句
應喏畢復再拜若父有疾耗之問即臨書垂泣語聲
哽咽愷之爲子也得父書而敬孝愛孝之心兩存使
愷承顏於朝夕其孝行必有可觀者推是心以性其
事君亦然

詩

孝敬真情切
我此書那抵萬金多
庭闈侍遠恭如

許想得承顏更若何

子之於母當鑒懷遺

陳遺之母好食鐺底焦飯遺作郡主簿常裝一囊每
煮食輒貯焦飯以遺母後值孫恩賊出吳郡其時袁
府君西征遺已聚得數斗焦飯未及歸家遂帶以從
軍戰敗軍潰逃走山澤遺獨以焦飯得活時人以爲
純孝之報子之孝於其母豈有望報之理及患難之
臨乎前乃得遺母之飯以自活良由孝心一萌神明
已自彰著可不敬哉

詩

孝行何心影響推神明偏爲孝扶持我知焦飯頻供
母那識危由療我饑

父之於子當鑒劉商鄧禹

劉商有子七人各受一經一門之內七業俱成鄧禹
有子十三人使各守一藝教養子孫爲後世法今之
習俗多以生男爲喜日望一日無所成就其原失於
素無繩墨約束雖悔何追韓退之遠其子於城南作
詩以警之必以年至十二三爲慮以至二十三而
賢不肖決矣有父如劉商鄧禹何憂乎哉

詩

俗喜生男復患多龍猶一判柰身何早分經藝為家
檢有石雖頑亦可磨

母之於子當鑒王珪母李氏

李氏嘗謂人曰吾兒必貴未知所與遊者何如人異
日房元齡杜如晦到其家李驚喜曰二客公輔才汝
貴不疑自孟母擇鄰之後無復有賢德之母光於史
牒珪母乃以交遊之賢卜知其子之貴噫知子莫若
父未聞有母之知子也異哉

本朝蘇參政易簡之母召入禁中 太宗問曰何以
教子遂成令器對曰幼則速於禮遜長則教以詩書

上顧左右曰今之孟母也非此母不生此子賜白金
千兩王母知其子以交遊蘇母教其子以禮遜其成
功一也母之教子所可能也母之知子為難能也故
作李氏之歌

詩

有母誰知有子賢擇交何止擇隣遷才如房杜難窺
際李氏警音獨了然

孫之於祖父當鑒張元

張元年十六其祖喪明三年元常憂泣晝夜讀佛經
禮拜以祈福祐後讀藥師經見有得視之言遂請七

僧燃七燈七日七夜轉藥師經行道其夜夢見一老翁以金鏡瘡其祖母於夢中喜躍驚覺徧告家人三日祖母果明鄉里咸難異之末俗之為子者未必能親嘗湯藥於其父母誰能至誠迫切療疾於其祖乎

詩

孫之於祖母當鑒劉商

祖母王氏盛冬思芹而不言劉商知之時年九歲乃自哭澤中聲不絕者半日忽若有人云止止聲方拭

淚間忽有芹生於地得斛餘以歸孩提之童誰無父母之愛又誰無祖母撫摩之恩當思芹不言之時雖少壯者承顏左右而未必知縱知之而誰為澤中之哭劉商九歲乃如是耶商自哭芹之後夢人謂之曰西籬下有粟瘡而掘之得粟十五鍾銘曰七歲粟百石以賜孝子劉商自是食之七載方盡孫之孝事祖母其感應有如是可不念哉

詩

九歲嬰孩方聚嬉誰從祖母薦其肥盛寒豈是多芹候天與劉商斛粟歸

子之於繼母當鑒王延

王延事後母夏扇枕席冬以身温被母愛魚求不得
杖之流血延叩冰而哭忽有魚長五尺躍出母食之
不盡於是撫之如已子事有不幸而遭繼母之罵者
其子能盡食於善不以杖之為酷而以吾之愛心為
重雖神明亦且應感况人乎杖我者所以責望我者
也此其所以為王延

詩

母無先後色為難起孝須從至性看受杖不妨流血
慘叩冰惟以得魚歡

子之在官無貽父母之憂當鑒陶侃陳堯咨
陶侃少為縣吏監魚梁以鮓遺母譙氏封鮓責之曰
爾以官物遺我不能益我乃增吾憂爾陳堯咨知制

出守荆南回其母何氏問曰古人居一郡一道必
有異政汝典名藩有何異效堯咨曰荆州路當衝要
郊勞宴餞迨無虛日然稍精於射衆無不服何氏曰
汝父訓汝以忠孝俾輔國家今不務仁政善化而專
卒伍一夫之伎豈汝先人之意耶以杖擊之金魚墜
地二母之望其子者不在利達貴顯而在身名事業
賢矣哉

詩

誰知母道是嚴君易豕家人備戒云爲歎斷機風教
限謔何此訓亦堪聞

子之在家宜安父母之貧當鑒韓康伯

韓康伯年數歲至大寒母商氏令康伯捉熨斗而謂
之曰且著襦尋當作複禪康伯曰不復須母問其故
對曰火在斗中而柄熱今既著襦下亦當暖母甚異
之其舅商浩稱其有出羣之器後官至太常子之生
於親之膝下豈不知家之有無世俗所謂不肖子假
儒衣冠浮浪城闕多出於豪家貴胄奈何貧家之子

亦復有長袖博帶者曾不卹父母劬勞之外攻苦食
淡商氏之愛其子既著襦矣將繼之以複禪此亦料
程寒具之常者康伯在童兒歲懼其母念之深借斗
柄以自喻蓋所以安母之心也知有母不知有身其
惟康伯乎

詩

親在誰能不有身我心憂母不憂貧寒襦蓋體粗爲
爾似此兒曾今幾人

弟妹之於姊兄當鑒孔融李勣

孔融年四歲與兄食梨而輒取小者人問其故答曰

小兒法當取小者李勣以姊病親爲煮粥回風羹其
鬚姊曰僕妻幸多何苦如是勣曰姊老勣亦老雖欲
久爲煮粥其可乎幼而四歲知有兄之尊老而公爵
知有姊之奉過人遠矣

詩

兄姊當尊衆所同幼誰悌順老誰恭孔融李勣皆亡
矣我讀遺書爲歛容

兄姊之於弟妹當鑒盧延賈遠

盧延賈王莽之亂有從妹年在孩乳其母不能活之
棄於溝中延賈而收養之遂至成人賈遠年五歲其

姊聞隣家讀書逐日抱遠聽之遠年六歲乃暗誦六
經姊之力也活從妹則易收之孩乳則難養幼弟則
易抱之聽讀則難如是恩愛不可以常理論也

詩

愛妹人皆有至情誰從溝壑活餘生更看幼弟爲難
養有姊能令學業精

兄弟異母當鑒王祥王覽

王祥弟覽繼母朱氏遇祥無道覽見祥被撻輒流涕
抱杖及長諫母少止使祥非禮覽亦與焉朱意乃止
天之生物使之一本如曰二本是違天也祥覽雖異

母而兄弟無二本是以覽之名雖亞於祥而孝友根於天性祥位至三公覽至光祿大夫覽奕世多賢才興於江左得非餘慶至此耶

詩

母驚弟傲舜尤難祥覽相須尚可安自古聖賢多不幸只留名教後人看

兄弟分財當鑒薛包李孟元

薛包好學有行弟求分財異居包不能止乃中分其財奴婢取老弱者曰我共事久矣田園取其荒者曰吾少所理意所戀也器物取朽損者曰素所服身口

所安也

李孟元性恭順與叔子就同居就有痼疾孟元推所有田園悉以遜就夫婦紡績日給嗟乎分異之事古人所難言也未俗安之恬不知怪有能於區分之際自取其不如意者亦復遜其所有以自勞苦者非有至德絕俗輩未可以語是也

詩

朴俗凋零誰忍聞古人何處有區分就如李薛猶難到叔世相尋以斧斤

夫之於婦當鑒何曾

何曾位至三公閨門整肅自少及長無聲樂嬖倖之
好與妻相見正衣冠相待如賓已南面妻北面再拜
上酒而酬酢之禮行焉曾雖華侈過度性實至孝嘗
面折阮籍居喪無禮於文帝之前以為汚染華夏宜
擯四裔其節行亦可嘉又復以賓禮行乎夫婦雖老
而謹其視晉朝漫滅典禮為如何孟子曰身不行道
不行於妻子使人不以道不能行於妻子曾亦有道
君子焉

詩

百年伉儷在蘋蘩禮法須從我輩看誰道晉人多曠

誕何曾獨解整衣冠

婦之於夫當鑒樂羊子之妻

樂羊子遊學一年而歸妻跪問其故羊子曰久行懷
思無異也妻乃引刀趨而言曰此織生自蠶繭成於
機杼一絲而累至寸不已遂成丈疋夫子積學當日
知其所亡以就懿德若中道而歸何異斷斯織乎羊
子感其言復還終業遂七年不反婦人何所知見而
能以學業責成其夫如此其後妻以賊劫又能身死
以全其姑嗟乎正節大義與寒霜烈日爭嚴不出於
丈夫而出於婦人也

詩

機斷何殊學半空婦人以此勉其夫一生節義寒冰凜寧殞微軀活我姑

婦之於姑當鑒姜詩之妻

姜詩事母至孝其妻奉母尤謹妻嘗泝流取江水以奉姑詩以後時而遣之妻乃寄止隣舍晝夜紡績日市珍羞使鄰母自遺其姑如是者久之姑感慙呼還養愈謹其子後因汲水溺死妻恐姑哀傷不敢言而託於遊學未幾舍側湧泉味如江水每旦輒躍雙鯉以供姑之膳赤眉賊過詩里掩兵過曰驚大孝必觸

鬼神婦之孝於其姑是亦理之常誰知姜詩之妻以取水後時而見逐乃安心隣舍而事姑之禮尤謹又誰能命其子取水而溺死乃語其姑以遊學惟恐哀傷此皆古今所未嘗聞之事是宜盜亦有道而驚曰大孝必觸鬼神也

詩

美婦真心世所無孝誠極處可驚吁子殘身逐渾閑事且要甘泉日養姑

婦翁之於女婿當鑒張宣子

張宣子家富於財欲以女妻同郡劉商其妻怒曰我

女年始十四姿識如此何慮不得為公侯妃而遽以
妻劉商乎宣子曰非爾所及也誠其女曰劉商至孝
冥感兼才識超世此人終當遠達為世名公汝其謹
事之張氏性亦婉順事王母以孝聞時司空齊王攸
辟商為掾征南將軍羊祐召參軍事宣子亦勸商就
辟商曰王母在堂一就辟命當盡臣禮便不得就養
宣子曰如子所言豈庸人所議哉宣子一喜其言而
妻之以女莫大乎宣子之見也婦翁冰清女婿玉潤
皆晉人浮誇等語不足為劉商道亦非宣子之所樂
聞也

詩

矜悅從人若可依東來何必數義之要令我女供蘋
藻不嫁劉商外更誰

叔母之於姪當鑒任氏

皇甫謐年二十不好學游蕩無度嘗得瓜來進叔母
任氏叔母曰孝經云三牲之養猶為不孝汝今年餘
二十目不存教心不入道無以慰我昔孟母三徙以
成人曾父烹豕以存教豈我居不卜隣教有所闕何
爾魯鈍之甚修身篤學自汝得之於我何有因對之
涕流謚乃感激帶經而農遂傳綜典籍自號元晏先

生謚晚年尤耽書志疾與食或有箴其損耗精神謚
曰朝聞道夕死可矣况命之修短在天乎謚又嘗自
表就武帝借書帝遂以一車書與之謚雖羸疾而披
閱不急復累詔竟不仕謚之初年游蕩乃如彼晚節
成名乃如此叔母任氏真孟母也孟母之訓其子母
之常也任母之訓其姪幾人哉

詩

誨存叔姪理宜然叔母希聞有此賢學術作成皇甫
謚不令孟母獨光前

伯父之於姪女當鑒劉平

劉平弟仲為賊所殺扶母奔仲平抱仲遺腸之女年
方一歲而棄其已之子母欲還之平曰力不能兩活
仲不可絕類兄弟之子猶子也猶子云者是不以兄
弟之子異乎已子也劉平不忍仲之無後而棄其子
以活其弟之子此皆絕無僅有之事

詩

大賢至識與誰評死厭藩籬障此生寧棄吾兒存仲
後鴿原高處看劉平

叔之於嫂當鑒顏含馬援

顏含有嫂樊氏喪明究心醫養求蛇膽不得忽有青

衣童子授之童子化成飛鳥而去嫂疾尋愈馬援敬
事寡嫂不冠不入廬世俗以嫂叔之無服也是以不
謹其名分惟賢者敬兄如敬其父事嫂如事其母顏
含馬援何愧焉

詩

事嫂須知事母同此身何處不溫恭人如顏焉今其
幾再見斯徒亦可宗

叔之於姪當鑒郗鑒謝安

郗鑒遭永嘉之亂窮餒無聊鄉人共食之鑒常携兄
子邁及外甥以就食鄉人以不能兼口辭之鑒乃獨

往含飯於兩頰吐與二兒此叔於艱食之中而能養
其姪者謝元之好佩紫羅香囊其叔謝安患之不欲
傷其意因戲睹而焚之此叔於至微之飾而能警其
姪者食之誨之皆欲驅之成人之地叔父之名郗鑒
謝安有焉

詩

叔也誰無撫姪心賢

寓情深吐餘頰哺無窮

愛焚却香囊有誨箴

姪之於叔當鑒王濟

王濟之叔湛兄弟宗族皆以為癡惟濟與之談易剖

新精妙晉武帝以濟之癡叔為問濟曰臣叔不癡山
濤以下魏舒以上湛由是顯名噫善則稱親理之常
然叔父吾父也兄弟宗族以為癡聞之天朝亦以為
癡而濟獨以為山濤魏舒之匹使湛果癡耶濟不敢
欺君以為賢使濟果不賢耶亦不能稱叔之美於其
上有姪如是何負叔耶

詩

剛道吾家叔不癡君言正對豈容欺階前有此奇蘭
玉王湛佳名藉汝馳

弟之於姪當鑒鍾氏郝氏

王渾妻鍾氏與弟婦郝氏皆有德行鍾離門高而與
郝相親重郝不以賤下鍾鍾不以貴凌郝時人稱鍾
夫人之禮郝夫人之法入皆以兄弟睦為家之肥苟
為姊姪者非其鍾郝雖有令兄弟亦為盛德之累

詩

婦德於人誰獨全一門二姓乃俱賢結褵母訓粗能
守鍾郝風嘉何憮然

內外兄當鑒皇甫謐

皇甫謐有從姑之子梁柳出守城陽有勸謐餞之者
謐曰柳為布衣時吾送迎不出門食不過鹽菜貧姑

不以酒肉為禮今作郡送之是貴城陽太守而饑柳
豈中古之人情非吾心所安也諡不以待城陽太守
之禮而待姑之子蓋平日所以相處者未嘗踰禮一
旦以太守之禮禮之諡為也

詩

窮達休休逐世情城陽太守即書生我於姑子思為
重貴顯都來草芥輕

甥舅恩義當鑒羊祐

史氏所載舅之於甥每致其厚如魏舒之倚甯氏周
翼之倚邾氏未聞甥之於舅而能致其厚者羊祐進

爵乞封舅子蔡襲晉之哀湛嘗謂世無涓陽情祐而
有此亦景星麟鳳祐封其舅之子念母也念母不可
得見則念舅矣念舅不可得見則念舅之子矣祐仁
孝人也墮淚之碑存乎峴山之下無所不厚可知也
夫

詩

誰能三復涓陽詩舉世寥寥此道衰念舅幸聞羊叔
子尚能封爵到孤兒

同居當鑒張公藝

張公藝九世同居高宗臨幸其家問本末書忍字以

對天子流涕遂賜練帛三世一變尚或有之九世而
同居者不惟士庶之所難雖九重之尊亦或發問噫
為善於家賞於朝信斯言也忍之一字其原得於顏
子犯而不校之學後進皆可以馴致

詩

萬木皆從一本傳比隣爾汝浪紛然我知忍字為家
寶會有精神到九天

隣居當鑒王吉

王吉東家有棗實垂吉庭中吉婦取以啖吉後知之
乃去婦禮與食孰重曰禮重一介微物非我所有而

取之賢者死不肯矣吉之妻取東家之棗以資吉之
奉使吉知之於未啖之初千百年愧赧之恨不可一
日釋况知之於既啖之後耶故其怒直至去婦也叱
狗而去婦以全其孝啖棗而去婦以厲其行婦去而
棗伐在常情有所不忍婦歸而棗存於名教實有所
尊王吉之德厥光大矣吉上疏於宣帝有曰夫婦人
倫大綱豈不知夫婦之恩為厚耶妻遇不以其正吉
所不為也

詩

堯已奇功人不思可堪隣物更容私子陽異日鈞衡

手正要掃除天下欺

獨居當鑒魯男子

魯男子獨處於室隣之嫠婦亦獨處於室嫠婦因風
雨室壞趨而託之男子不納嫠婦曰子獨不見柳下
惠乎男子曰柳下惠可吾固不可孔子聞之曰善學
柳下惠者莫若魯之男子執虛如執盈入室如有人
士君子於不聞不睹之地每致其惑於安平無事之
日若曰風雨室壞而納嫠婦特倉卒中姑息耳魯之
男子所以別嫌微者非其道也其絕之也宜

詩

看取中庸數百言惟於謹獨最居先魯誇男子為標
致我謂持循理合然

貧賤則勵固窮之操當鑒謝僑

或作僑

謝僑素貧嘗一朝無食其子啓欲以班史質錢答曰
寧餓死豈可以此充食乎饑食渴飲人之常爾一日
之計不辦而僑之子請以其書質錢貧可知矣僑寧
餓死而不從亦可謂固窮之異乎人

詩

去信猶勝去食難質書那肯給朝餐謝僑脫或從兒
請歿後身名作麼看

富貴則防席勢之驕當鑒房元齡穆寧柳玘
房元齡治家有法度常恐諸子驕侈席勢陵人於是
乎集家誠柳玘清直有父風常恐子孫事墜先訓則
異他人雖生可以苟壽死不可見祖先地下於是乎
集家訓穆寧居家嚴有四子曰贊曰質曰負曰賞皆
以行義顯時人目之以珍味如酪酥醃醢乳腐亦家
令之嚴乃至此唐正元間言家法者惟韓穆二家即
韓休穆寧也

詩

世祿驕從氣體移誰將禮樂問茲基儻嚴家法如三

子福汝孫孫無盡期

詩事所刊三十條皆匹夫匹婦可與知可能行者
孟子曰規矩方員之至聖人人倫之至前序所言
堯舜王季文王皆極其至者匹夫匹婦如有一介
之行顯聞於世皆能致身貴顯如鄧禹李勣等之
立大功如孔融賈逵輩之為名儒如何曾謝安王
吉數君子致身宰輔皆古賢人也如王珪之母李
氏皇甫謐之叔母任氏姜詩樂羊子之妻皆古賢
婦也信史所傳風馨可掬若夫四維不張六逆馴
致古人卓絕之行不可及見得見庸行者斯可矣

庸行猶不及見是不知有狼之仁烏之哺何容身
於天地之兩間集事詩鑒姑為擇善而從者設勿
謂今之俗不能行古之道其聞之也久其漸之也
深童而習之知古人有是事雖不能盡倣古人所
不可及之迹仰事俯育心所同然稍有戾於名教
獨無愧於心乎孟子曰壯者以暇日修其孝弟忠
信入以事其父兄出以事其長上可使制超以撻
秦楚之堅甲利兵此言何謂也孟子之言則孝悌
忠信可以無敵於天下况一家乎行之一家則一
鄉而準行之一鄉則一國而準一國所化天下化

之又非詩鑒之所能名也蒲陽吏隱方昕景明書

Large stylized watermark or seal, possibly reading '書' (Shu) or '書' (Shu).

Small square seal impression, likely a collector's or library's mark.

